

հյուսված՝ արի մաղը, գործ էր ածվում տանը, ոչ կալի վրա, արդեն պարաստի ալյուրը մաքրելու համար: Խախալնէրի մեջ զանազանում էին քարմաղը և ավելի նուրբը՝ փէկէմաղը⁴³: Մաքրելու համար դիմում էին և տէփօւրիին՝ փայտե լայն կլոր, ցածրիկ պոռնգներով սկուտեղին, որի վրա հատիկները վեր ձգելով և թափ տալով հեռացնում էին ավելորդ խառնուրդները, մեծ մասամբ քարերը: Մաղերը շինում էին տեղում, օրինակ՝ Ուզ գյուղում, բայց գերադասում էին գնել շրջիկ զարաչիներից՝ բոշաներից⁴⁴, գնչուներից, որոնք իրենց վրաններով գավառից գավառ անցնելով՝ այստեղ էլ պարբերաբար երեւում էին: Նրանք գալիս էին գլխավորապես Լենինականից և Ախալքալաքից, ուր անցել են հայերի հետ Կարինից 1828—1829 թթ. մեծ գաղթի ժամանակ՝ Պասկելիչի օրոք մղված ուս-տաճկական պատերազմից հետո:

Արդեն քամած հատիկները լցնում էին մաղե շվալնէրը՝ մեծ պարկերը: Ամեն մեկ շվալ տանում էր 5—7 փութ: Չվալնէրը շալակում էին ոչ միայն տղամարդիկ, այլ հաճախակի և կանայք: Զանգեզուրի կիսը չէր վախենում ծանր բեռ շալակելուց, նույնիսկ պառավ հասակում, բայց իհարկե տղամարդու շալակած շվալից ավելի թեթև շվալ: Ներսում. շվալնէրից ածում էին ավելի մեծ, մոտ 3—5 շվալ վերցնող, նույնպես մաղե խարարնէրը:

Յորենը լվանում էին. մեծ մասամբ գետի ափին կամ աղբյուրի մոտ, թե մաղերի և թե տաշտերի օգնությամբ, ապա փոում էին արևի տակ՝ չորացնում՝ ջաղաց ուղարկում և որպես ալյուր պահում, կամ ուղղակի թափում էին ամբարի՝ հնիֆալի մեջ, իսկ ավելացածը պահում էին ֆօրի՝ հորի մեջ: Հորը փորվում էր խոնավութունից բոլորովին ապահով չոր տեղ, ունենում էր մարդու իրանի լայնության տրամագծով բերան և հեղհետե լայնացող կողեր: Հատակն ու կողերը պատում էին ձողտով կամ կաղնու տերևով, լցնելուց հետո ծածկում էին բարե կամ կավե կափարիչով և ապա հողով: Կափարիչով ծածկելուց առաջ երեսին զրվում էր հասկերից կապած մի խաչ— որ քաշկէրն և շար ոգինները շմտնեն՝ չզողանան: Ժամանակ առ ժամանակ ստուգվում էր՝ արդյո՞ք հորի մեջ ցորենը չի սկսել որթնոտել, ծաղկել կամ այլ կերպ վնասվել: Հորից ցորեն հանելը երբեմն կապված էր լինում այնտեղ հավաքված գազերից ուշաթափվելու կամ խեղդամահ լինելու վտանգի հետ:

Կալը մաքրելուց հետո և կալսել սկսելուց առաջ գալիս էր քահանան և կալն օրհնում: Դրա համար աշխատանքները վերջանալուց հետո նա ստանում էր իր բաժինը, սովորաբար 4 կիլոյի չափ ցորեն⁴⁵:

Թե՛ արտը հավաքելիս և թե՛ կալը վերջացնելիս զանգեզուրցին խույս էր տալիս բերքը— խորձերի քանակը, շվալնէրի թիվը բարձրաձայն հաշվելուց՝ այսպես կոչված հաշվի վախից... Նա հավատում էր, որ բարաֆւթը՝ օգտակար և հարատև գործադրելիութունը կարող էր պակասել: Ավելի ևս չէր սիրում որևէ մեկին այդ թիվը ճիշտ ասել, այս անգամ և այն պատճառով, որ ավելի քիչ բաժին հանի հողատիրոջն ու պետական և գյուղական հարկահավաքին:

Ա Ն Ա Ս Ն Ա Պ Ա Հ Ո Ի Թ Յ Ո Ի Ն

Երկրագործութունից հետո Զանգեզուրի ժողովրդական հարստությունը հիմնված էր անասնապահության վրա, որը հայ բնակչության տարեկան արդ-

⁴³ Սիսիանում:

⁴⁴ Բոշա բառն այստեղ գործածական չէ:

⁴⁵ Արծվանիկ: